

38. Quod istud erat negotium, quod VASISHTHÆ magistri carmina sacra et regis arcitenentis tela conjuncta perficere non potuissent?

39. Ille una cum viris justis quotidie actorum reorumque causas dijudicandas ipse audiebat.

40. Deinde civibus suis maturos testimoniorum datorum fructus impertiebat, perspicua benevolentia pronuntiatos.

41. Cives, quorum felicitas a patre illius aucta erat, veluti fluvii a *Srāvana* mense, sub hoc rege majus etiam incrementum capiebant, veluti illi *Bhādra* mense.

42. Quod loquebatur, haud falsum erat; quod dederat, haud rursus auferbat; promissum suum eo tantum violabat, quod hostes devictos in locum suum restituebat.

43. Juventus, pulchritudo et potestas vel singulatim superbiam gignere solent; sed hæ in illo conjunctæ erant, neque tamen animus ejus superbiebat.

44. Ita in dies civium amorem sibi concilians, quamquam juvenis, inconcussus erat, arboris instar, quæ altas cepit radices.

45. Quia inimici externi mutabiles sunt atque longe remoti, ille sex inimicos internos, constantes, primo debellavit.

46. In illo benevolo Fortuna, etsi natura mobilis, constans erat, veluti aur linea in lapide Lydio.

47. Mera mansuetudo mollities est, sola severitas ferarum mos; quare ill duabus illis conjunctis incepta sua peragere studebat.

48. Regi illi, qui radiorum instar exploratores emittebat, nihil in orbe terrarum ignotum erat, veluti Soli, nubibus libero.

49. Quod pro quavis diei noctisque parte regibus faciendum ordinatum est id ille peragebat sine ulla cunctatione.

50. Quotidie cum consiliariis suis habebat deliberationes; quæ, quamquam tam sæpe habitæ, non innotescebant, quia januæ clausæ tenebantur.